

Oqaaseqaatit tamanut tunngasut

Inatsisissatut siunnersuummi pineqarput soraarnerussutisiaqalernissamut aaqqissuussinerit akileraarutitigut iluaqutissartallit pillugit malittarisassat, tamatumalu kinguneranik pisariaqalersimavoq oqaasiliorneri arlalitsigut allangortissallugit. Tamatuma saniatigut inatsisissatut siunnersuutip ilagai kinguaariit nikinnerannut tunngatillugu malittarisassat kiisalu umiarsuarni DIS-imiittuni akissarsiat pillugit malittarisassat sukaammerneqarnerat.

Siunnersuutigineqarpoq soraarnerussutisiaqalernissaq siunertaralugu naafferartumik sillimmasiutinut akiliutit ilanngaatigineqalersinnaalissasut soorluttaaq tamanna soraarnerussutisiaqalernissamut aaqqissuussinerni ingerlaavartumik tunniussisartunut akiliutaasartut pillugit atuutereersoq.

Maannakkumut ilanngaatigineqarsinnaasutuaasimagaluarput soraarnerussutisiaqalernissamut aaqqissuussinernut ingerlaavartumik tunniussisartunut akiliutit pingaarnerusumik siunertaqartut ingerlaavartumik soraarnerussutisianik tunniussisarnissaq utoqqalisunut, innarluuteqalersunut, aapparisanut katissimasanut qitornanullu soraarnerussutisianik. Aaqqissuussinerit taamaattut ilisarnaatigaat soraarnerussutisiatut tunniuttakkat nalinginnaasumik unittarmata pissarsisinnaatitaasup toqunerani. Tigusartakkat akileraaruteqaataasussaapput.

Soraarnerussutisiaqalernissaq siunertaralugu naafferartumik sillimmasiutit ingerlaavartumik tunniuttakkat assignagit aningaasanngorlugu sillimmasiutit tunniunneqartarlutik amerlaqatigiiaarlugit ukiut isumaqatigiissuteqarfisat ingerlaneranni.

Soraarnerussutisiaqalernissaq siunertaralugu naafferartumik sillimmasiutinut akiliutit ilanngaatigineqarsinnaassappata naafferartumik sillimmasiutini aalajangersagaasariaqarpoq sillimmasiutit naafferartumik tunniunneqartassasut sivikinnerpaamik ukiut qulit ingerlaneranni, aammalu naafferartumik tunniuttakkat sillimmasersimasoq inuugallartillugu tassunga inuttaanut tunniunneqartassasut. Aaqqissuussinermut akiliisarneq aallartittariaqarpoq sillimmasersimasoq 60-inik ukioqalersinnagu. 60-inik ukioqalereernermi taamaallaat isumaqatigiissuteqartoqarsinnaavoq taamatut ukioqalinnginnermi isumaqatigiissutaasimasumut ilassutissatut, aammalu tunniussinermut piffissaritat taakkuusut atorlugit aningaasat sillimmasiissutit siusinnerusukkut isumaqatigiissutaasimasut affai sinnerlugit amerlassuseqassanngillat.

Tamatuma saniatigut naafferartumik tunniussuineq aatsaat aallartissinnaavoq sillimmasersimasoq 60-inik ukioqalerpat Skatterådi ukiukinnerunissamik akuersisimangippat. Taamaattorli aamma tunniussinissaq isumaqatigiissutigineqarsinnaavoq sillimmasersimasoq suli 60-inik ukioqalerani toquppat innarluuteqalerpalluunniit. Taamaattorli isumaqatigiinnitigineqarsinnaanngilaq naafferartumik tunniutassaq kingulleq

tunniunneqassasoq sillimmasersimasoq 80-inik ukioqalersinnagu. Toqunermut tunngatillugu salliutitassat inissinneqarsinnaassapput.

Kiisalu ilanngaatiginnissinnaanermut tunngatillugu piumasaaqaataavoq soraarnerussutisiaqalernissaq siunertaralugu naafferartumik sillimmasiisoqarsimassasoq inuunermut soraarnerussutisiaqalernissamulluunniit sillimmasiinermt selskabimi Kalaallit Nunaanni angerlarsimaffeqartumi sillimmasersimanissaq.

Sillimmatinik pisartagallip naafferartumik sillimmasiineq maanaannakkut atorunnaarsippagu soraarnerussutisiaqalernissamut tunngasortaa peertussaavoq, taamaattumillu sillimmasersimasup aningaasatigut iluaqutigisinnaavaa akileraarutissat kinguartinneqarnerat kingornatigut akileraartitaanissaq kisimi pineqarpat. Taamaattumik siunnersuutigineqarpoq kingornatigut akileraartitaanissamut taarsiullugu inuunermut soraarnerussutisiaqalernissamullu sillimmasiinermt selskabip aningaasat tunniutassai 45 procentimik akiliuteqaataassasut. Tamatuma peqatigisaanik siunnersuutigineqarpoq malittarisassat taakkuattaaq atuutissasut soraarnerussutisiaqalernissamut aaqqissuusinerni ingerlaavartumik tunniussisartuni maanaannakkut unitsitsinerni, katersineq pilersinneqarsimappat soraarnerussutisiaqalernissamut aningaasaateqarfimmi imaluunniit inuunermut soraarnerussutisiaqalernissamullu sillimmasiisarnermut selskabimi Kalaallit Nunaanni angerlarsimaffeqartumi. Maanaannakkut unitsitsinertut isigineqassapput iliuitsit aaqqissuussinermi piumasaaqatinut akerliusut. Tamatumani akiliut naatsorsorneqassaaq aaqqissuussineq maanaannakkut unitsinneqarsimasuuppat aningaasassaagaluit tunngavigalugit.

Aaqqissuussinernit taamaaqataanit danskit soraarnerussutisiaqalernissamut aningaasaateqarfiini imaluunniit danskit inuunermut soraarnerussutisiaqalernissamullu sillimmasiinermt selskabiini pilersinneqarsimasunit nuunneqartut, akiitsortinneqartut maanaannakkulluunniit unitsitaasut pineqartillugit akiliutissaq taamaallaat danskit statskassiannut akilernerqartassaaq. Tamatumunnga Landskassi taarsiivigineqartassaaq tamanna pillugu Danmarkip Kalaallit Nunaatalu akornanni taarsiiviginnittarneq pillugu 21. august 1990-imi isumaqatigiissutaat kingusinnerpaamik 31. august 1997-imi allangortinneqartoq atorlugu.

Taamaalilluni soraarnerussutisiaqalernissaq siunertaralugu naafferartumik sillimmasermermt akiliutit ilanngaatigineqarsinnaalermata maannamut periusiusimasoq, tassalu akileraarnermt oqartussaasut pissutsini immikkut ittuni soraarnerussutisiaqalernissaq siunertaralugu naafferartumik sillimmasertarnerup imaluunniit soraarnerussutisiaqalernissaq siunertaralugu naafferartumik sillimmasertarnerup akileraarutinutaaq tunngasumik soraarnerussutisiaqalernissamut aaqqissuussinermut ingerlaavartumik tunniussisartumut kingumoortumik allangortitsinissamik akuersisarsimanerigaluat ingerlateqqinneqassanngilaq.

Siunnersuutigineqarpoq akiliut landskassip kommunip akileraarfiusup kommunillu agguartassagaat selskabit akileraartarneranni malittarisassat malillugit.

Pingaartumik savaateqarnermik inuussutissarsiuteqarnermi kutterillu atorlugit inuussutissarsiortermit kinguaariit nikittarnerat oqinnerulersinniarlugu siunnersuutigineqarpoq inuussutissarsiornikkut ingerlataq ilaqutariit iluanni kinguaariinnut tullernut tunniunneqarsinnaalissasoq.

Suliffeqarfiup nammineq pigisap allamut tunniunneqarnerani kinguaanut tunniussinerup kinguneraa tunniussisoq tunniussinermini iluanaarutiminit akileraartinneqassanngimmat. Taamaalilluni pigisat nalillit nalikillineqarsinnaasut allamut tunniunneqarneranni nalikillilerneqarsinnaasut akileraaruteqassanngillat. Akerlianilli piginnittuulersup nalikilliliinerit ingerlatiinnassavai tunniussisup nalikilliliinermit tunngavigisai tunngavigalugit, tassa soorlulusooq piginnittuulersup pigisap nalilik pissarsiarisimagaa tunniussisup pissariarinninnerata nalaani taamatullu akeqartillugu. Kinguaariit paarlaannerannut illuatungiliutassatut siunnersuutigineqarportaaq ilaqutariit paarlaanneranni illuatungeriit paarlaannermit iluanaarutitit annaasatillu naatsorsorsinnaassagaat suliffeqarfiit allanut tunniunneqarneranni malittarisassat nalinginnaasut atorlugit, tassa apeqqutaatinnagu suliffeqarfik ingerlataq akileraarnermit nalingata nalinginnaasumillu nioqqutigineqarnerata nalingata akornanni nalilerlugu tunniunneqarnerasoq.

§ 34 a-mi aalajangersagaasoq, tassalu umiartortut tamakkiisumik akileraartussaataasut umiarsuarni Dansk Internationalt skibsregisterimi nalunaarsugaasuni inuttaasut akileraarutinut katillugu akiligassaat DIS-imi akissarsianut sanilliullugu appartassasoq pilersinneqarsimavoq anguniarlugu umiartortut maani najugaqavissut Royal Arctic Line A/S-ip umiarsuaani usinik angallassisuni Kalaallit Nunaata Danmarkillu akornanni aalajangersimasumik ingerlaartartuni inuttaajuarsinnaaqullugit. Kingornatigulli paasineqarsimavoq aalisariutit fabrikkillit, aalisariutit nunamut tulaassuisut, kalittaatit allallu nunatta imartaannaviani angalasut aamma Dansk Internationalt Skibsregisterimi nalunaarsorneqarsinnaasut. Naalakkersuisut isumaqaramik pissutissaviusumik patsisissaqanngitsoq umiarsuarni taakkunani inuttaasut oqilisaassinermut malittarisassanut ilaasariaqanngitsut siunnersuutigineqarpoq malittarisassaq allanngortinneqassasoq imaalillugu oqilisaassinermut malittarisassanut ilanngunneqartussat tassatuaassasut umiarsuarni usinik angallassissutini Kalaallit Nunaata nunallu allat akornanni aalajangersimasumik angalasuni inuttaasut, tamatumani ilanngullugit umiarsuit usinik angallassissutit kalaallit umiarsualiviisa akornanni aalajangersimasumik angalasut.

Siunnersuut Pisortaqarfinnut susassaqtunut, Kanukokamut, SIK-mut, PFA-mut, Royal Arctic Linemut aamma Arctic Umiaq Linemut tusarniaassutigineqarsimavoq akissutaallu ilaatigut inatsisissatut siunnersuummi ilanngunneqarput.

Naatsorsuutigisariaqarpoq qaninnerusoq isigalugu soraarnerussutisiaqalernissaq siunertaralugu naafferartumik sillimmasiutinik pilersitsisarnermut periarfissat isertitatigut ajunaarutaalaarnissaat. Tamatumunngali ilanngullugu eqqaamasariaqarpoq soraarnerussutisiaqalernissamut aqqissuussinernit maanaannakkut unitsitanit isertitassatut siunnersuutigineqartut kiisalu imaamat soraarnerussutisiaqalernissamut aqqissuussinertigut tigusartakkat aningaasarsiat

akileraaruteqaataasussat naatsorsorneranni ilanngunneqartussaammata. Taamaattumik ungasinnerusooq isigalugu nalilernerqarpoq siunnersuut annikitsuaraannarmik ajunaarutaasinnaasoq.

§ 34 a-mut ilaanissamut piimasaasut sukaammerneqarnissaannik siunnersuutikkut ilimagineqarpoq pisortat karsiisa iluanaarutaat ukiumut 1 mio. kruuninik qaffariassasut, kisiannili ilaqutariit pigisaminnik paarlaattarnissaat pillugu siunnersuut ilimagineqarpoq isertitatigut annikitsuinnarmik kinguneqassasoq.

Siunnersuut allaffissornikkut annikitsuinnarmik kinguneqassaaq.

Aalajangersakkanut ataasiakkaanut oqaaseqaatit.

§ 1, nr. 1-imut

Allannguut oqaasiliorninnaanut tunngavoq. Aalajangersakkap assigaa siusinnerusukku § 17 b, imm. 1-imiit imm. 3-mut, taamaattorli § 17 b, imm. 7 peerneqarpoq aalajangersagaq pisariaaruttutut isigineqarmat.

Malugeqquneqarpoq imm. 3-mi malittarisassaq 6000 kruuninut tunngasoq atuummat aaqqissuussinernut Danmarkimi Kalaallit Nunaannilu soraarnerussutisiaqalernissamut aningaasaateqarfinnut aamma inuunermut soraarnerussutisiaqalernissamullu sillimmasiinermit selskabinut, kisiannili "ataasiaannartumik tunniussinermut malittarisassaq" imm. 4-miittoq taamaallaat atuulluni soraarnerussutisiaqalernissamut aningaasaateqarfinnut aamma inuunermut soraarnerussutisiaqalernissamullu sillimmasiinermit selskabinut Kalaallit Nunaanni angerlarsimaffeqartunut.

§ 1, nr. 2-mut

Soraarnerussutisiaqalernissaq siunertaralugu naafferartumik sillimmasiutit aningaasatigut sillimmasiutaapput isumaqatigiissutigineqarsimavorlu sillimmasiutit ukiut arlallit ingerlaneranni tunniunneqartassasut naafferartumik naafferartumillu tunniuttakkat sillimmasersimasup toqnerani unitsinneqassanngitsut.

Sillimmasiutinut akiliutit aningaasarsiat naatsorsorneqarneranni ilanngaatigineqarsinnaassappata sillimmasiinerup imarisassaanut makkua piimasarineqarput. Sillimmasiinermit siunertarineqassaaq naafferartumik amerlaqatigiinnik tunniussisoqartassasoq sivikinnerpaamik ukiut qulit ingerlaneranni. Naafferartumik tunniuttakkat sillimmasersimasumut tunniunneqartassapput tunniunneqarnerata nalaani sillimmasersimasooq

toqusimangippat. Sillimmasersimasup toqunerata kingornatigut salliutitassatut inissinneqassapput "ilaquttat qaniginerpaasat" sillimmasiinermit isumaqatigiissutit pillugit inatsimmi § 105, imm. 5 tunngavigalugu imaluunniit sillimmasersimasup aapparisaq katissimasaa imaluunniit inooqatigisaa, tamatumani ilanngullugit aapparisaq avissimasaq/averusersimasaq imaluunniit inooqatigisaa, imaluunniit inuuneq naallugu kingornussisussat, tamatumani ilanngullugit qitornarsiat taakkualu inuuneq naallugu kingornussisussai 24-it inorlugit ukiullit. Tullerriaarnerat aalajangersimasuunngilaq.

Sillimmasiut pilersinneqassaaq inuunermut soraarnerussutisiaqalernissamullu sillimmasiinermit selskabimi Kalaallit Nunaanni angerlarsimaffeqartumi nunamilu maani inuunermut sillimmasiinermit ingerlatsinissamut akuerisaasumi. Sillimmasiutinik tiguisartoq sillimmasersimasuussaaq sillimmasiummillu piginnittuussalluni. Sillimmasiutit pilersinneqarsimappata sulisup sulisitsisuatalu isumaqatigiissuteqarneratigut sulisoq sillimmasersimassaaq sillimmasiummillu piginnittuulluni.

Sillimmasiut pilersinneqarsimassaaq sillimmasertoq 60-inik ukioqalersinnagu. 60-inik ukioqalersimanissamut killiliinermit patsisaavoq soraarnerussutisiaqalernissamut katersineq orniginarnerussangatinneqarmat naafferartumik sillimmasiineq utoqqalivallaannginnermi pilersinneqarpat.

Sillimmasersimasup 60-inik ukioqalereernerani taamaallaat sillimmasertoqarsinnaavoq taamatut ukioqalertigani sillimmasiutaasimasunut ilassutaasumik siusinnerusukkut isumaqatigiissutaasumi tunniussinissamut piffissaliussat atorlugit siusinnerusukkut sillimmasiutigisimasat affai sinnernagit aningaasartaqartumik. Aalajangersakkami anguniagaavoq soraarnerussutisiaqalernissaaq sioqqutillaarlugu akiliutit ilanngaatigineqarsinnaasut amerlavallaalinnginnissaat.

Naafferartumik tunniuttakkat aallartinneqarsinnaapput siusinnerpaamik sillimmasersimasup 60-inik ukioqalerneraniit ukiukinnerunissaaq Skatterådimit akuerineqarsimangippat. Taamaattorli isumaqatigiissutigineqarsinnaavoq aningaasat tunniunneqarsinnaasut sillimmasersimasup toqunerani imaluunniit innarluuteqalernerani 60-inik ukioqalersigani. 60-inik ukioqalereersimanissamut killiliinerup immikkullu akuerineqarsinnaanissamut periarfissat assigaat soraarnerussutisiaqalernissamut ingerlaavartumik tunniussisartumik tunniussisartunut malittarisassat atuutereersut.

Tunniussinissamut piffissarititaq sillimmasersimasup 80-ileereernerani kinguartinneqarsinnaanngilaq tassami taamaalisoqarpat naafferartumik sillimmasiineq soraarnerussutisiaqalernissaaq siunertaralugu sillimmasiinermit tunngajunnaassammat.

Allannguut oqaasiliorderanut tunngavoq. Aalajangersakkap assigaa siornatigut § 17 b, imm. 4 aamma 5. Malugeqquneqarporli ukiumi akissarsiviusumi aalajangersagaq illersuutaasoq, tassalu ukiumut akissarsivimmut tunngatillugu akissarsianut ilanngaait ukiup ilaanut tassunga tunngasut 15 procentimik annerusinnaangimmata, akileeqataassutitut akiliutinulluunniit tunngasut maanna ilanngunneqarmata katillugu akileeqataassutitut akiliutinullu soraarnerussutisiaqalernissamut ingerlaavartumik tunniussisartunut aammalu soraarnerussutisiaqalernissaq siunertaralugu naafferartumik sillimmasiutitut.

Soraarnerussutisiaqalernissaq siunertaralugu naafferartumik sillimmasiutitut pilersinneqarsinnaapput imminut sillimmasiutitut aammalu sulisumut aaqqiinertut. Soraarnerussutisiaqalernissaq siunertaralugu sillimmasiineq atorfeqarnermut tunngasuusimappat sulisitsisoq sillimmasiinermit akiliisussaavoq. Sulisitsisup akilertagai sulisup isertitaasa akileraaruteqaataasussat naatsorsorneranni ilanngunneqassanngillat. Tamanna atuuppoq imaassimagaluarpalluunniit sulisitsisup sulisullu akornanni akiliutissat avinneqassasut. Taamatut immikkut isiginnissinnaaneq atuutereerpoq akileeqataassutitut akiliutinullu soraarnerussutisiaqalernissamut aaqqissuussinermut ingerlaavartumik tunniussisartumut atorfeqarnermut tunngatillugu pilersitsisoqarsimatillugu.

Imm. 3-mi immikkut akuersinissamut aalajangersagaq oqitsunngorlugu ingerlanneqartariaqarpoq. Tamanna atuuppoq imaakkaluarpalluunniit kukkuneq ajornangitsumik pinngitsoorneqarsinnaagaluartoq, imaluunniit 15 procentimik malittarisassamik paasisimasaqannginneq, ilimagineqarsinnaanngippat soraarnerussutisiaqalernissamut aningaasaateqarfinni pineqartuni piaaraluni aningaasat unitsinneqartut.

§ 1, nr. 4-mut

Maannamutut soraarnerussutisiaqalernissamut aaqqissuussinernit ingerlaavartumik tunniussisartunit tunniussat tiguisup isertitaasa akileraaruteqaataasussat naatsorsornerannut ilanngunneqartassapput, tamatumani ilanngullugit § 17 b, imm. 3 aamma 4 malillugit aningaasanngorlugit tunniuttakkat apeqqutaatinnagu tiguisoq tasaanersoq piginittoq namineq, aapparisa katissimasaa, tamatumani ilanngullugit aapparisaq avissimasaq, inooqatigisaq, inuuneq naallugu kingornussisussat, qitornarsiat taakkualu inuuneq naallugu kingornussisussat.

Naafferartumik sillimmasiutitut tunniuttakkat aamma sillimmasersimasup isertitaasa akileraaruteqaataasussat naatsorsornerannut ilanngunneqassapput tunniussat sillimmasersimasorpiaamut tunniunneqarpata naafferartumik tunniussisarnissamik isumaqatigiisummi piumasaasut malillugit. Naafferartumik tunniuttakkat tunniunneqarpata sillimmasersimasup aapparisaanut katissimasaanut, tamatumani ilanngullugit aapparisaq avissimasaq, inooqatigisaq inuunerluunniit naallugu kingornussisussat, qitornarsiat taakkualu inuuneq naallugu kingornussisussat inuit pineqartut tunniuttakkat akileraaruteqaatigisussaavaat.

Tunniuttakkat inunnut siuliini taaneqanngitsunut tunniunneqarpata, aapparisaq avissimasaq salliutitassamik inissisimammat, aamma inuup pineqartup akileraaruteqaatigisussaavai.

Aammattaaq siunnersuutigineqarpoq soraarnerussutisiaqalernissamut aaqqissuussinernit ingerlaavartumik tunniussisartunit imaluunniit soraarnerussutisiaqalernissaq siunertaralugu naafferartumik sillimmasiutaasartut soraarnerussutisiaqalernissamut aningaasaateqarfinni imaluunniit inuunermut soraarnerussutisiaqalernissamullu sillimmasiivittut selskabini Kalaallit Nunaanni angerlarsimaffeqaanngitsuni pilersitaasut akissarsiat akileraarutaasussat ilaattut naatsorsuutigineqassasut. Tamannattaaq atuuppoq aaqqissuussineq sillimmasiinerluunniit allamut tunniunneqarpat imaluunniit §§ 17 b-mi c-milu malittarisassat akerliannik iliortoqarpat. Akissarsiat akileraaruteqaataasussat naatsorsorneranni ilanngutassat tassaapput aningaasat iliuuseqarnerup nalaani aaqqissuussinerup atorunnaarnerani tunniunneqarsinnaasimagaluartut, immaqaluunniit akeqaanngitsumik isumaqatigiissuteqarnerup assigisaataluunniit nalinga. Aalajangersagarli oqaasiinnartigoortuugallassaaq piviusumik imaqarani Danmarkip Kalaallit Nunaatalu akornanni taarsiinissamik isumaqatigiissut 21. august 1990-imeersoq kingusinnerpaamik 31. august 1997-imi allanngartitaasoq atuuttillugu.

§ 1, nr. 5-imut

Aalajangersakkap siusinnerusukku § 17 c assigaa , taamaattorli erseqqissarneqarluni sulisitsisup akileeqataassutai saneqqunneqarsinnaanngitsut aaqqissuussineq soraarnerussutisiat akileraarutaasarnerat pillugu inatsimmi § 53 a-mut tunngasumik pilersitaasimappat.

§ 1, nr. 6-imut

Aalajangersakkap assigaa siusinnerusukku § 17 d-iusimasoq, taamaattorli iluarsiissutigineqarluni aalajangersakkamut maanna ilaalmata inuunermut sillimmasiutit soraarnerussutisiaqalernissamullu sillimmasiutit §§ 17 b-mi c-milu ilaanngitsut.

§ 1, nr. 7-imut

Siunnersuutigineqarpoq inummut tassungarpiaq tunngatillugu aningaasat soraarnerussutisiaqalernissamut aaqqissuussinermiit imaluunniit sillimmasiutiniit soraarnerussutisiaqalernissamut aaqqissuussinermiit imaluunniit sillimmasiutiniit taamaaqataanut allamut nuunneqarsinnaalissasut. Tamatumani piumasarineqarpoq aaqqissuussineq tamarmi nuunneqassasoq kiisalu nuunneqartut tassaassasut soraarnerussutisiaqalernissamut aningaasaateqarfiit aamma inuunermut soraarnerussutisiaqalernissamullu sillimmasiisarfiit Kalaallit Nunaanni angerlarsimaffeqartut akornanni nuussinerit. Taamatut nuussineq pisinnaappat

nuunneqartut aaqqissuussinermiit aaqqissuussinermut allamut tunniussatut akiliutitulluunniit isigineqassanngillat. Taamaalilluni aningaasat nuutat akileraarusiinermik akitsuusiinermilluunniit kinguneqassanngillat imaluunniit ilanngaatisatut atorneqarsinnaanatik.

Taamaalilluni nuussinereit pisinnaapput soraarnerussutisiaqalernissamut aaqqissuussinereit ingerlaavartumik tunniussisartut § 17 b,-miittut akornanni, naafferartumik sillimmasiutinit § 17 c,-miittuniit soraarnerussutisiaqalernissamut aaqqissuussinermut § 17 b,-miittut nuussinereit kiisalu naafferartumik sillimmasiutit naafferartumik sillimmasiummut allamut § 17 c,-miittumut nuunneqartut. Taamaalilluni periarfissaqanngilaq soraarnerussutisiaqalernissamut aaqqissuussinermiit ingerlaavartumik tunniussisartumiit naafferartumik sillimmasiisarnermut nuussinissaq.

Nuussineq pisinnaanngilaq nuussineq sioqqullugu aningaasat akileraaruteqaataasussanngorsimappata akitsuusiinermilluunniit ilaalersimappata. Taamaattumik aningaasat nuunneqartussat nuunneqarnerat sioqqullugu inuttaanut tigusassanngortinneqassanngillat.

Ilanngullugu siunnersuutigineqarpoq Skatterådip akuerisinnaassagaa nunani allani sillimmasiinermut aaqqissuussinerniit nuutat soraarnerussutisiaqalernissamut aaqqissuussinernut § 17 b-mut § 17 c-mullu ilaasunut akiliutitut suliarineqassanngitsut.

§ 1, nr. 8-mut

Soraarnerussutisiaqalernissamut aaqqissuussineq ingerlaavartumik tunniussisartooq imaluunniit soraarnerussutisiaqalernissaq siunertaralugu naafferartumik sillimmasiineq maanaannakkut unitsitaappat aningaasat tunniunneqartut 45 procentiat akiliutigineqaataassaaq. Tamannattaq atuuppoq aaqqissuussineq sillimmasiinerluunniit allamut tunniunneqarpat, imaluunniit §§ 17 b-mi c-milu malittarisassat akerliannik iliuuseqartoqarpat. Taamaattoqartillugu akiliutissat naatsorsorneqassapput aaqqissuussinereit atorunnaarnerata nalaani tiguneqartussaasimagaluartut tunngavigalugit, immaqaluunniit akiliinani isumaqatigiissutip assigisaataluunniit aningaasatigut nalinga tunngavigalugu. Taamaallaat akiliuteqartitsisoqassaaq aaqqissuussinereit pineqartut soraarnerussutisiaqalernissamut aningaasaateqarfinni imaluunniit inuunermut soraarnerussutisiaqalernissamullu selskabini Kalaallit Nunaanni angerlarsimaffeqartuni pilersinneqarsimappata.

45 procenti akilernerqartussaq akilersinneqassaaq pineqartoq qanorluunniit akissarsiaqarsimagaluarpas, tassalu pineqartup akissarsiai akileraarutitaqartussat miinusimiikkaluarpataluunniit.

Aaqqissuussinereit taamaattut danskit soraarnerussutisiaqalernissamut aningaasaateqarfiini imaluunniit soraarnerussutisiaqalernissamut selskabiini pilersinneqarsimappata akiliutit immaqalu ilassutaasumik akileraarutit taamaallaat

akilerneqassapput danskit naalagaaffiannut. Tamatumunnga Landskasse taarsiivigineqassaaq Danmarkip Kalaallit Nunaatalu akornanni taarsiisuteqartarnissamik isumaqatigiissut 21. august 1990-imeersoq kingusinnerpaamik 31. august 1997-imi allanngortinneqartoq aqutigalugu.

Siunnersuutigineqarportaaq aapparisaq avissimasaq averusersimasarlunniit soraarnerussutisianit ingerlaavartumik tunniuttakkanut naafferartumillunniit sillimmasiutinut tunngatillugu pisartakkaminut nammineq akileraartartunngussasoq akiliummillu akiliisussaalluni. Kiisalu siunnersuutigineqarpoq pissarsiaminut tunngatillugu salliutitassamik inissiisinnaassasoq akileraarutigineqartussatut akiliutigineqartussatullunniit isigineqassanngitsumik.

Inuk aqqissuussinermi piumasaasut unioqqutillugit iliortoq pisussaavoq soraarnerussutisiaqalernissamut aningaasaateqarfik imaluunniit inuunermut soraarnerussutisiaqalernissamullu sillimmasiinermit selskabi iliuutsini pillugit piaartumik ilisimatissallugu. Pineqartoq taamatut ilisimatitsinngikkuni § 107, imm. 3, nr. 3 malillugu pineqaatissinneqarsinnaavoq.

§ 1, nr. 9-mut

Aqqissuussinermi § 17 b-mi 17-c-miluunniit pineqartumi akiliisussanngortitsineqarpat soraarnerussutisiaqalernissamut aningaasaateqarfiup sillimmasiinernullunniit selskabip naatsorsoriarlugu akiliutissaq tigungmiinnassavaa. Akiliut Akileraartarnermut Pisortaqarfimmut akilerneqassaaq kingusinnerpaamik aningaasat sinneruttut piginnittumut tunniunneqarnerat ilutigalugu.

Akiliutip akilerneqarnera ilutigalugu soraarnerussutisiaqalernissamut aningaasaateqarfiup imaluunniit sillimmasiinermit selskabip akiliineq pillugu Akileraartarnermut Pisortaqarfik ilisimatissavaa. Nalunaarut pissaaq akiliineq pillugu immersugassap immersorneratigut, taannalu Akileraartarnermut Pisortaqarfimmit suliaassaaq.

A-skattit unerartinneqarnissaannut malittarisassat assigalugit soraarnerussutisiaqalernissamut aningaasaateqarfik sillimmasiinernullunniit selskabi landskassimut akiliisussaassaaq soraarnerussutisiaqalernissamut aningaasaateqarfiup sillimmasiinernullunniit selskabip akiliutit unerartinnissaannut pisussaaffini naammassisimangippagu, imaluunniit akiliut annikinaarlugu unerartissimappagu.

Kingusinnerusukkut Naalakkersuisut aalajangersassavaat akiliutip Akileraartarnermut Pisortaqarfimmut qanoq akilerneqartarnissaanut malittarisassat ersarinnerusut.

§ 1, nr. 10-mut

Aalajangersakkakut Skatterådi periarfissinneqarpoq nakkutigissallugu ilaqutariinni kinguaariit nikinnerat siunertarineqanngikkaluartumik akileraarutitigut iluaqutissarsiffigineqarnersoq. Skatterådip ilaqutariinni kinguaariit nikinnerat akuerinngitsoorsinnaavaa ilimagineqarpat kinguaariit nikinneranni pingaarnerusutut siunertarineqartoq imaluunniit siunertat pingaarnert ilagigaat akileraarutinut akiliinngitsoornissaq.

Tulliullutik piginnittunngorsinnaasut tassaapput qitornat, qitornaqqiutit kiisalu qatanngutit taakkualu qitornaat qitornaqqiutaallu. Qitornarsiat ilaqutavittut isigineqarput. Tunniussisoq piginnittunngortorlu Kalaallit Nunaanni tamakkiisumik akileraartartuusussaavoq § 1, imm. 1, nr. 1-imi najugaqarnissamik malittarisassat malillugit.

Siunnersuutigineqarpoq inuussutissarsiut ingerlataq ilaqutariit iluanni kingornunneqarsinnaassasoq apeqqutaallunili suliffeqarfiup pigisai nalillit tunniunneqarnersut akileraarutitigut nalingata nalinginnaasumillu niuernerminingata akornanni nalilerlugit. Pigisat akileraarutitigut nalingat nalinginnaasumik niuernerminingannit appasinnerusimappat kinguaariit nikinnerannut malittarisassat atorineqarnissaannut piumasaavoq akileraarutitigut nalingannik nalilerlugit tunniunneqassasut, taamaalilluni tunniussisoq tunniussinermini akileraarutitigut annaasaqarsimanerminik nalunaarsuisinnaajunnaarsillugu.

Kinguaariit nikinnerata sunniutigissavaa tunniussinermining iluanaarut tunniussisup akileraarutigissanngimmagu. Suliffeqarfiup pigisai nalillit piginnittuulersumut akileraaruserneqartassapput, soorlulusooq tunniussisup pisiarinninnerata nalaani taamatut akilerlugit pisiarineqarsimasut. Akileraarutitigut nalikilliliinerit tunniussisup ingerlassimajunnagai piginnittuulersumit ingerlassimasaatut isigineqassapput. Pigisat nalillit tunniussisup inuuniutiminut atatillugu imaluunniit iluanaarniutigalugit pissarsiarisimappagit pigisat nalillit tunineqarneranni iluanaarutit annaasalluunniit piginnittunngortup suliarisimasai taassuma akileraarusigassanik isertitaasa naatsorsorneranni ilanngunneqassapput imaassimappat iluanaarut annaasarluunniit tunniussisup akissarsianik akileraarusigassanik nalunaarsuineranni ilanngunneqarsinnaasimagaluartut taanna tunisisuusimappat.

Kinguaariit nikinneranni periaasissatut allatut siunnersuutigineqarpoq tunniussisup piginnittunngortullu toqqarsinnaagaat iluanaarutit annaasallu tunniussinermut tunngasut suliffeqarfiit allanut tunniunneqartarnerannut malittarisassat malillugit suliarineqassasut apeqqutaatinnagu pigisat nalillit nalinginnaasumik nioqqutigineqarnerminnit appasinnerusumik naleqarnersut, taamaaqataanik naleqarnersut imaluunniit akileraarusiinermining nalingannit naleqarnerunersut.

Periaatsit taakkua marluk arlaat atorineqarsinnaavoq, tassalu tunniussisup piginnittunngortullu suliffeqarfimmi pigisamit nalilimmiit nalilimmut allamut toqqarsinnaallugu piginnittunngortoq kingornussissanersoq imaluunniit imm. 3-mi periaasissaq atorineqassanersoq, imaluunniit taamaattoqassappat tunniussisoqassanersoq nalinginnaasumik niuernermining akigisat atorlugit.

Piginnittunngortoq piginnittunngorneq sioqqullugu isertitamigut isertitai akileraaruteqaataasussat miinusimiissimappata pineqartup isertitamigut amigaatini suliffeqarfiup kingornatigut tunniunneqarnerani iluanaarutinit ilanngaatineqarsinnaanngillat.

§ 1, nr. 11-mut

Siunnersuutigineqarpoq inuit tamakkiisumik akileraartartussaataasut umiarsuarni Dansk Internationalt Skibsregisterimi nalunaarsimasut DIS-mi isertitamikkut katillugu akileraarutitigut apparsaaffigineqartarnerat qumartinneqassasoq, tassami ineriartornerup takutissimmagu aalisariutit fabrikkkit, aalisariutit tulaassuisut kalittaatillu aamma Dansk Internationalt Skibsregisterimi ilaalersinnaasut.

Tamanna oqilisaanissamik aalajangersakkami pineqartumi aallaqqaammut siunertaasimannikkaluarpoq, tassami aalajangersagaq pilersinneqarsimammat qulakkeerumallugu inuit Kalaallit Nunaanni najugaqartut umiarsuarni Royal Arctic Linep usinik angallassissutaani inuttaasinnaanissaat naammaginartumik aningaasatigut iluaqutigalugu, tassami DIS-mi nalunaarsimanerup kinguneranik inuttaasut akissarsisarmata ilanngaatisat ilanngaatigereerlugit.

Taamaattumik siunnersuutigineqarpoq aalajangersagaq umiarsuarnut Kalaallit Nunaata imartaani angalasunut tunngatillugu taamaallaat atuutilissasoq usinik angallassisunut Kalaallit Nunaata nunallu allat akornanni aalajangersimasumik angallassissutaasunut, tamatumani ilanngullugit umiarsuit usinik angallassissutit umiarsualivimmiit umiarsualivimmut allamut angallassisut oliamillu assartuutit. Pineqartunut siullernut minnerpaamik 1.100 - aappaannullu 450 bruttotonagemik usitutigisut pineqarput. Taamaalilluni aalajangersakkami ilaajuassapput Royal Arctic Linep umiarsuai tamarmik, Kalaallit Nunaanni pilersuisutut angalagaluarunik imaluunniit Atlantikoq ikaarlugu angalagunik taakkuluunniit tamaasa angallafigigaluarpatigut.

Umiarsuarmi inuttaasut Kalaallit Nunaanni tamakkiisumik akileraartussaataasut umiarsuarmilu Dansk Internationalt Skibsregisterimi nalunaarsimasumi akissarsisartut aalajangersakkamiittuassapput umiarsuaq kalaallit imartaanni angalasuunngippat.

§ 1, nr. 12-imut

Siunnersuutigineqarpoq Akileraartarnermut Pisortaqarfik aalajangiisassasoq suliassani akiliisussaataitanermut akiliutillu naatsorsorneqarnissaannut tunngasoq § 17 i tunngavigalugu. Aammattaaq siunnersuutigineqarpoq Akileraartarnermut Pisortaqarfiup aalajangiineri suliap inernerissagai pisortaqarfimmut qulliunerusumut ingerlateqqinneqarsinnaanngitsut.

§ 1, nr. 13-imut

Siunnersuutigineqarpoq § 17 i malillugu akiliutinit isertitat landskassip, kommunip akileraarfiusup kommunillu agguartassagaat selskabit pillugit akileraarutit § 82, imm. 7-ip, pissuseqataanik.

§ 1, nr. 14-imut

Ersarissarneqarpoq suliffimmut ingerlataminnut tunngatillugu erniatigut isertitaqartut imaluunniit ernialigassanik atortitsisut kajumissaarneqanngikkaluarlutik ukiut tamaasa akileraarutit nalilernerqarnissaannut tunngatillugu akileraartarnermut pisortanut nalunaarutigisassagaat paasissutissat ernianut akilerneqartunut iluanaarutaasunulluunniit tunngasut kiisalu ukiup qaangiuttup naanerani kontomik piginnittut ataasiakkaat ernialiiffigineqarsimanagerat erniallu akiligassanngorsimasut, erniat akilerneqarnissaannut ulluliussaq kiisalu ukiup kingulliup naanerani aningaasat uninngasut akiligassalluunniit. Paasissutissiisussaataaernermi pineqarputtaaq kontot il.il. ukiup ingerlanerani atorunnaarsitaasimasut.

§ 1, nr. 15-imut

Siunnersuutigineqarpoq inuunermut sillimmasernermut soraarnerussutisiaqalernissamullu selskabit pisussaataaassasut akileraartarnermut pisortat ilisimatissallugit naafferartumik sillimmasiutinut akilutit, taakkunanngaaniit tunniussat il.il. pillugit, soorluttaaq taamaareersoq soraarnerussutisiaqalernissamut aaqqissuussinerni ingerlaavartumik tunniussisartuni.

§ 1, nr. 16-imut

Siunnersuutigineqarpoq soraarnerussutisiaqalernissamut aningaasaateqarfik imaluunniit sillimmasiinerneq selskabi pineqaatissinneqarsinnaasasooq uninngatitsinissamut pisussaaffitsik eqqortissimanngikkunikku imaluunniit akiliutissaq unitsitartik piffissaq eqqorlugu akilersimanngikkunikku, soorluttaaq taamaareersoq A-skattimut unerartsitsisussaaneqarnermut tunngatillugu.

§ 1, nr. 17-imut

Siunnersuutigineqarpoq akiliutinik akiliisussaataaasooq pineqaatissinneqarsinnaasooq pineqartup soraarnerussutisiaqalernissamut aningaasaateqarfik sillimmasiinerneqarnermut selskabi ilisimatissimanngippagu qanoq iliuuseqarsimalluni il.il. aaqqissuussinerup ilanngaattissatigut piumasarisaasa naammassineqarsinnaajunnaarnerannik kinguneqartumik.

§ 2-mut

Siunnersuutigineqarpoq inatsit atortuulissasoq 1. januar 2001 aallarnerfigalugu.